

Govor člana Predsjedništva BiH Sulejmana Tihića na 11. sesiji Igmanske inicijative

*Poštovani predsjednici Mesić i Marović,*

*Dame i gospodo,*

Želim vas sve skupa još jedanput pozdraviti i zaželiti dobrodošlicu u Bosnu i Hercegovinu i Sarajevo. Čestitam **Igmanskoj inicijativi** koja je organizirala ovu konferenciju i osigurala prisustvo eminentnih učesnika iz naših zemalja.

Vjerujem da će i ovaj skup doprinijeti boljem razumijevanju problema i prilika, kako u regionu, tako i na temu ***Deset godina poslije Dejtonskog sporazuma – slijedeći korak suradnje***.

*Dame i gospodo,*

BiH u vrijeme i neposredno prije Dejtona

Da bih govorio o ***Deset godina nakon Dejtona***, moram napraviti kratak osvrt kako je izgledala moja zemlja i društvo u vrijeme i neposredno nakon potpisivanja *Dejtonskog sporazuma*.

Ukratko: oko **2,2 miliona prognanih i izbjeglih**. Gradovi, naselja, privreda, infrastruktura, komunikacije devastirani, oštećeni ili uništeni. Bosna i Hercegovina podijeljena, ratnim, entitetskim i drugim linijama razdvajanja. Na terenu tri sukobljene i dobro naoružane vojske, sa **oko 500.000 vojnika i 70.000 pripadnika** međunarodnih vojnih snaga. Tri brojne policije, koje su daleko od profesionalnih i demokratskih standarda.

**Državne granice porozne.** Granični prelazi izvan kontrole državnih institucija. Sloboda kretanja ograničena. Prelazak entitetskih linija smatran je i činom hrabrosti

**Pravni sustav Bosne i Hercegovine podijeljen** i više uvezan sa susjednim državama nego međusobno. Intenzivno prisustvo i miješanje u unutarnje poslove iz susjednih zemalja.

Bilo je to vrijeme **stotina hiljada unesrećenih i nezadovoljnih ljudi**, prognanih sa svojih ognjišta, bez mogućnosti da se vrate. Njihova imovina, ako nije bila uništena, bila je devastirana ili uzurpirana. Povratak je bio nezamisliv, a oni koji bi se usudili da se vrate izlagali su opasnosti svoje živote i zdravlje. Mnogi su u tim pokušajima bivali ubijeni ili ranjeni.

**Ratni zločinci na slobodi.** Suradnja organa vlasti sa Haškim tribunalom na niskom nivou. O hapšenju optuženih ratnih zločinaca nije se moglo ozbiljno razgovarati sa većinom predstavnika bh. vlasti. U početku su se zločinci potpuno slobodno kretali, čak i prolazili kraj punktova međunarodnih vojnih snaga!

**Ekonomska i socijalna situacija, izuzetno teška.** Ekonomski, carinski i poreski sustav podijeljeni. Stotine hiljada penzionera, ratnih vojnih invalida, porodica šhida, poginulih i demobilisanih boraca, bez adekvatnih naknada. Uopće, bili su rijetki zaposleni koji su primali plaću.

**Institucije države ne postoje, a i ono što je uspostavljeno ne funkcioniра.** Predsjedništvo se dugo nije moglo dogovoriti gdje će održavati sjednice, a kamoli o nečem drugom. Vijeće ministara, sa predsjedavajućim koji se rotira, imalo je samo tri ministarstva. U isto vrijeme, entiteti, posebno RS,

funkcioniraju nezavisno, kao države u državi. Međunarodna zajednica se ne snalazi, a nedostaje i političke volje.

### ***Dame i gospodo,***

#### deset godina poslije

Danas, deset godina poslije, **Bosna i Hercegovina je neupitna kao država i više nema ozbiljnih političkih snaga, u i izvan nje, koje mogu dovesti u pitanje njen teritorijalni integritet i suverenitet.** Uspostavljene su dodatne nadležnosti i brojne institucije na državnom nivou. Umjesto tri, Vijeće ministara broji devet ministarstava, sa predsjedavajućim koji se ne rotira. **Centralna banka BiH** je jedna od najuspješnijih institucija Uspostavljene su Državna granična služba, Uprava za indirektno oporezivanje, jedinstvena Obavještajno-sigurnosna agencija - OSA, carina, Agencija za policijsku zaštitu - SIPA, Zajednička komanda Oružanih snaga Bosne i Hercegovine. Od 01. januara 2006. godine neće biti vojske RS i FBiH. Nadležnosti odbrane u potpunosti su prenesene na državni nivo. Provođe se sveobuhvatne reforme administrativnog i obrazovnog sistema. Usvojen je Sporazum o reformi policijskog sistema.

Ostvaren je znatan napredak u **povratku izbjeglih i raseljenih.** Prema podacima UNHCR, do sada se vratilo preko **milijon (oko 50%) izbjeglih i prognanih**, od čega u RS oko 260 hiljada, u FBiH oko 730 hiljada, a u Brčko Distrikt oko 22 hiljade. U inozemstvu još uvijek živi preko milion bh. prognanika i izbjeglica. Gotovo u potpunosti je vraćena oduzeta imovina, istina, često uništena i devastirana. Osigurana sloboda kretanja, uključujući i sigurnost za povratnike. Ima još problema sa kojima se susreću povratnici, počev od nezaposlenosti, prava na zdravstvenu zaštitu, obrazovanja, penzija itd.

Na **ekonomskom planu** osigurana je **makroekonomsku stabilnost**, sa inflacijom kao u Evropskoj uniji. Imamo najjaču valutu u regionu. U odnosu na poslijeratni period, GDP je utrostručen. Devizne rezerve povećane su za 15 puta i u julu ove godine iznosile su 3,6 milijardi KM. Redovno otplaćujemo vanjski dug koji iznosi 4,2 milijarde KM. Konsolidiran je bankarski sistem. Industrijska proizvodnja je u stalnom porastu. Inozemna ulaganja se povećavaju i u prošoj godinu su iznosila oko milijardu KM. Također se bilježi i stalni porast javnih prihoda, koji su samo u ovoj godini veći za oko 15%.

Nažalost, **nezaposlenost je i dalje najviša u regionu** i iznosi oko 41%. Prema procjeni Centralne banke, ako se uzme u obzir neregistrirana ekonomija, to je 21,5%. Pokrivenost izvoza uvozom je tek 34,5%, zbog čega je vanjsko-trgovinski deficit u prvom polugodištu iznosio 3,5 milijardi KM.

### ***Dame i gospodo,***

#### šta dalje?

**Ovo su činjenice koje možemo tumačiti na različite načine.** Neko će iz ovoga izvući zaključak da *Dejtonski sporazum* nije polučio očekivane rezultate. Drugi će reći da je to uspješan primjer angažmana međunarodne zajednice. Za jedne su provedene reforme spore i djelimične, za druge brze i sveobuhvatne. Istina je negdje na sredini. Sigurno da je *Dejtonski sporazum* osigurao postizanje osnovnog cilja radi kojeg je potpisan - **zaustavio je rat na prostoru bivše Jugoslavije.** Ali **nije osigurao** neophodne uvjete za **trajan i pravedan mir.** U svakom slučaju, konačnu ocjenu dat će vrijeme i povijest

Bez obzira na sve probleme, **Bosna i Hercegovina je na dobrom putu prema NATO i EU.** Očekujemo poziv za članstvo u NATO 2008. godini, a početkom decembra odluku Evropske komisije o početku razgovora za zaključenje sporazuma o stabilizaciji i pridruživanju.

Danas, deset godina kasnije, postavlja se pitanje **šta dalje i kakva nas budućnost čeka?**

Problemi koje imamo, posljedica su agresije na našu zemlju, razaranja, zaostajanja u tehnološkom razvoju, **ali i skupog i nefunkcionalnog političkog sistema.** Ustavni sistem uspostavljen ili legaliziran *Dejtonskim sporazumom*, sastoji se **od tri ustava i jednog Statuta**, koji su nastali u različito vrijeme i različitim okolnostima.

**Ustav RS** usvojen 1991., kada je RS definirana kao *država srpskog naroda*. **Ustav Federacije BiH**, usvojen u Vašingtonu 1994., kao konstitutivne narode poznaje samo Bošnjake i Hrvate i predviđa mogućnost konfederalnih veza sa Republikom Hrvatskom, **Ustav Bosne i Hercegovine** usvojen 1995. godine, kao Aneks IV *Dejtonskog sporazuma*, i, na kraju, **Statut Brčko Distrikta**, koji zahvata teritoriju oba entiteta, ima svoju samostalnost i nedefinirane odnose sa državnom strukturom. **Ovi ustavi nikada nisu do kraja međusobno usuglašeni.**

Zbog toga je postojeće uređenje Bosne i Hercegovine prepreka, ne samo procesima unutarnje integracije, već i njenom putu za članstvo u evroatlantskim strukturama.

**Prema tome, moramo mijenjati ustavni sistem Bosne i Hercegovine.** Sada, kada obilježavamo 10. godišnjicu *Dejtonskog sporazuma*, krajnje je vrijeme da se pređe iz *dejtonske u briselsku fazu*.

Samo do prije godinu dana, razgovor o promjenama Ustava Bosne i Hercegovine bio je tabu tema. Ko bi spominjao promjenu Ustava, proglašavan je neprijateljem jednog od bh. naroda. Ni u međunarodnoj zajednici nisu voljeli takve, jer to zahtijeva mnogo više posla i intenzivniji angažman. Međutim, danas, kako se približavamo članstvu u evroatlantskim strukturama i uvjetima koji se pred našu zemlju postavljaju, svi se slažu da moramo pristupiti promjenama Ustava Bosne i Hercegovine i reformi ustavnog sistema uopće. To više nije sporno ni kada su u pitanju političari iz Republike Srbije, ali i međunarodna zajednica.

Normalno, postoje **razlike o tome šta i koliko mijenjati.** Mišljenja sam da je moguće postići konsenzus kada je u pitanju buduće ustrojstvo vlasti na lokalnom i državnom nivou. Manje su sporne i nadležnosti centralnih organa vlasti i one se definiraju ispunjavanjem uvjeta za članstvo u evroatlantskim strukturama.

Znatne razlike postoje kada je u pitanju **središnji nivo vlasti.** Većina bh. političara smatra da organizacija države sa dva entiteta nije dobra, jer nije utemeljena na ekonomskim, geografskim, saobraćajnim i historijskim kriterijima. Entitetska podjela predstavlja liniju sukoba i razdvajanja. Međutim, u RS još uvijek ne postoji potreban konsenzus za ukidanje entiteta. Normalno da bez suglasnosti predstavnika svih naroda nije moguće mijenjati unutarnju organizaciju.

**Onda, šta činiti?** Jedino što je moguće. Voditi dijalog i demokratsku raspravu. Mijenjati ono o čemu postoji neophodni stepen suglasnosti i za šta se može osigurati potrebna parlamentarna većina. Nije dobro da predstavnici dva naroda preglasaju predstavnike trećeg naroda. Ali, isto tako, predstavnici jednoga naroda, koji su ustavna rješenja utemeljili na ratnim *osvajanjima* i ostvarili veća prava u odnosu na druge, trebalo bi da uvažavaju opravdane primjedbe i prihvate rješenja koja osiguravaju ravnopravan položaj svih konstitutivnih naroda. Nije dobro da bilo koji narod u Bosni i Hercegovini ima više prava u odnosu na druge narode.

U tome će biti potrebna podrška i pomoć onih koji su nam nametnuli ovakva ustavna rješenja i to uglavnom u smislu medijacije, organizacije i posredovanja. Konačna rješenja moraju znači bh. političari.

### ***Dame i gospodo, za kakvu se BiH zalažem***

Većina naših građana Bosnu i Hercegovinu želi kao **građansku, decentraliziranu državu multietničkih regija, organiziranu na tri nivoa vlasti** - lokalni (općine i gradovi), regije / provincije i državni, sa institucijama i nadležnostima koje omogućavaju punopravno članstvo u evroatlantskim strukturama. To znači i funkcionalnu i jeftiniju administraciju, sa jednim predsjednikom, vladom umjesto Vijeća ministara, premijerom umjesto predsjedavajućeg, te funkcionalnim dvodomnim parlamentom, Zastupničkim i Domom naroda. Pitanja **vitalnog nacionalnog interesa** treba da budu jasno određena, a ne, kao sada, predmet zloupotrebe i blokade rada institucija. Pri tome mora biti osigurana ravnopravnost konstitutivnih naroda, ali i drugih. Između ostaloga i tako što bi na tri ključne državne i pravosudne funkcije bili izabrani predstavnici svih konstitutivnih naroda. Također treba osigurati nacionalnu rotaciju na ključnim pozicijama

### ***Dame i gospodo,***

**Protiv sam bilo kakvih nacionalnih (etničkih) ekskluziviteta**, bez obzira na brojnost pojedinih naroda. Posebno je opasan nacionalni tj. etnički ekskluzivitet na teritorijama koje nose naziv po jednom narodu. Svjedoci smo do kakvog za i stradanja nas je to dovelo. U to vrijeme, pripadnost nekom narodu ili vjeri bila je dovoljna za progon sa određenih teritorija (tzv. *etničko čišćenje*), oduzimanje imovine, odvođenje u logor, egzekuciju ili stradanja ljudi na drugi način.

**Protiv sam davanja naziva sa etničkim predznakom** javnim preduzećima, ustanovama, gradovima, naseljima i dr. Također treba eliminirati tzv. **pozitivnu nacionalnu diskriminaciju**. To je jedan vid dominacije, bez obzira da li se ona ostvarivala na nivou Bosne i Hercegovine ili, pak, na nekom njenom dijelu.

Zato pozdravljam **odluku Ustavnog suda Bosne i Hercegovine** o ukidanju nacionalnih tj. etničkih predznaka za naseljena mjesta. Smatram da treba promijeniti i ostale nazive koji sadrže etničke odrednice, osim ukoliko se radi o isključivo kulturnim i etničkim ustanovama ili društvima nekog od bh. naroda.

**Etnička prava i slobode** jednoga naroda ne smiju ugroziti prava i slobode drugih naroda, već ta prava moraju biti međusobno usuglašena. Isto tako, etnički interesi ne smiju biti iznad interesadržave i univerzalnih ljudskih prava i sloboda. Najbolje ćemo zaštititi prava svoga naroda ako se borimo za zaštitu prava i interesa drugih naroda.

Moramo biti odgovorni, spriječiti ponašanja koja mogu dovesti do raspirivanja međunacionalne ili vjerske mržnje i netrpeljivosti, uključujući i **krivičnu odgovornost onih koji zagovaraju ili potiču međunacionalnu netrpeljivost i mržnju**. Također moramo zabraniti rad i djelovanje organizacija koje to potiču, kao i **sve organizacije koje slijede djelovanje fašističkih organizacija iz Drugog svjetskog rata**.

**Posebnu odgovornost** u tome imaju **mediji**, koje mnogi terete za raspirivanje međunacionalne i vjerske mržnje i netrpeljivosti, te stradanja kroz koja smo prošli. Uloga medija i danas je važna. Ali, da bismo mogli insistirati na odgovornosti medija, moramo im omogućiti da rade u skladu sa zakonom i budu nezavisni od političkih i drugih uticaja.

U ovome kontekstu, ključno pitanje ne samo za Bosnu i Hercegovinu, već i cijeli region, jeste **odnos prema ratnim zločinima i zločincima**. To je važno kako zbog istine i pravde, tako i zbog prošlosti, ali i budućnosti. Ne smijemo dozvoliti da zbog različitih istina o prošlosti dođe do novih sukoba u budućnosti. **Ne mogu ratni zločinci biti nacionalni heroji**, jer oni nemaju ni nacije, ni vjere! Oni su, jednostavno, zločinci! Zato je i dalje važna suradnja sa Haškim tribunalom, ali sve više i uloga domaćeg pravosuđa.

Isto tako smatram važnim formiranje **Komisije za istinu o stradanjima građana Bosne i Hercegovine**. Ona treba da objektivno i profesionalno utvrdi istinu o stradanjima svih građana, bez obzira na nacionalnu ili vjersku pripadnost. Mora biti tačno utvrđeno koliko je ubijeno i uopće stradalo ljudi, srušeno kuća, vjerskih i kulturnih objekata, gdje su bila mjesta stradanja, masovne grobnice, logori itd. Ne smijemo dozvoliti da se ova pitanja politiziraju i koriste u dnevno-političke svrhe. Samo na temeljima istine i pravde možemo graditi međusobno povjerenje i dobre odnose među narodima i državama.

### ***Dame i gospodo, odnosi sa susjedima***

**Geografski položaj, zajednička povijest, etnička struktura stanovništva naših zemalja, infrastrukturne i druge veze upućuju nas na svestranu suradnju.** U našem regionu se sreću, prepliću i uglavnom u harmoniji, koegzistiraju različiti narodi, religije i kulture. Često jedan narod živi sa obje strane jedne ili više granica. U jednoj kao većinsko, u drugoj kao manjinsko stanovništvo. Te odnose moramo uređivati prema evropskim standardima individualne i kolektivne zaštite, a ne na principima dominacije.

Bosna i Hercegovina je iskreno i trajno opredijeljena **za unapređenje prijateljskih odnosa** sa susjednom Republikom Hrvatskom i Državnom zajednicom Srbije i Crne Gore. Dobrosusjedske odnose moramo graditi na temeljima poštivanja suvereniteta i teritorijalnog integriteta i ravnopravnosti. Upućeni smo jedni na druge. Svjesni smo da nam susjedi mogu pomoći, ali i odmoći. To je dokazala i najnovija povijest, posebno u Bosni i Hercegovini. Treba graditi **specijalne odnose sa cjelim državama, a ne samo njihovim dijelovima**.

Želim današnje zemlje što prije postanu članice evroatlantskih struktura. Neophodno je da u tom procesu prihvatimo i primjenjujemo evropske standarde. Put do jedne od zvjezdica na zastavi Evropske unije nije nimalo lakak. Mi ga možemo i moramo preći. Uz bolje razumijevanje i suradnju naših zemalja, to može biti brže i lakše.

Hvala.